

# 日本三代實錄卷十一 清和紀十一

太上天皇 清和天皇

起貞觀七年六月，盡十二月

左大臣-從二位-兼行左近衛大將臣-藤原朝臣-時平等，奉敕撰

## 一. 禁斷擇棄惡錢與停廢乞人居

太上天皇 清和天皇

六月，庚戌朔，日有蝕之。

授和泉國-從五位上-泉穴師神，正五位下。

四日癸丑，授從五位下-後院隼神，從五位上。

五日甲寅，從三位-守權大納言-兼右近衛大將-藤原朝臣-氏宗上言：「氏宗，忝以朦昧，備列槐棘，負荷之憂，寤寐無息。日者降詔，令進意見。公卿宰相，儒官賢士，每各輸忠盡誠，陳上深謀遠慮。爰下公卿，更相評議。日月空過，遞為矛盾，卻恐評議之上，更有後議之勞。氏宗無計愚情之不及，誤評一兩人奏狀。再三悚愧，遂無所裨。今望諸臣所進意見奏狀中，先擇要切，且以施行。皆是抄出古典，無言非道。稍隨時宜，遂盡其志。謹勒管見，俯待取捨。」

八日丁巳，因幡國-無位-阿太賀都建御熊神、大和佐美神，並授從五位下。

十日己未，禁京畿及近江國賣買之擇棄惡錢曰：「弘仁十一年六月九日下知大藏省曰：『鑄錢司所進新錢，雖文字頗不明，而不失體勢。亦有小疵，行用無妨。宜猶納。』而問愚者不悟此旨，專任己心，擇棄不受。或稱文字不全，計十嫌二三。或號輪郭有缺，舉百欠八九。是以要升米者，飢口難餬，買屯綿者，寒身不暖。宜于路頭，嚴加禁止。若有乖違，隨即決答。」

從四位下-東子女王，卒。

十一日庚申，月次并神今食祭。天皇不御神嘉殿，遣親王、公卿奉祭如常。

十四日癸亥，授近江國-正五位下-勳八等-兵主神，從四位上。

是日，禁京畿、七道諸人寄事御靈會，私聚徒眾，走馬騎射、小兒聚戲，不在制限。

左京職言：「天長年中，於八條二坊，造立七間板屋一字，以為乞人所居。而乞人之輩，別處停留，無居止。頃年駢役囚人，隨便寄住。去年以來，無人居宿。加之，每遇風雨，逾增腐損，欲加修理，非無煩費。望請除棄以脫職累。」太政官處分：「依請。」

十六日乙丑，大風暴雨，壞廬舍，折樹木。建禮門扉二枚倒仆。

左京人-六世-無位-三坂王，賜姓-淡海真人。河嶋王子裔孫也。

廿一日庚午，暹明。月色正黃，有赤雲覆之。

廿二日辛未，山城國-從五位上-天津石門別稚姬神，列於官社。

廿三日壬申，左京人-正六位上-坂井王，賜姓-清春真人。礪城皇子之裔孫也。

廿六日乙亥，任左右相撲司。正三位-行中納言-兼陸奧出羽按察使-源朝臣-融，參議-正四位下-行左衛門督-源朝臣-多，參議-正四位下-行左大辨-兼勘解由長官-南淵朝臣-年名，參議-從四位下-守右大辨-兼播磨權守-大枝朝臣-音人，參議-左近衛中將-從四位下-兼行伊豫守-藤原朝臣-基經，從四位上-行左兵衛督-兼前權守-在原朝臣-行平，正五位下-守左中辨-兼行太皇太后宮亮-藤原朝臣-家宗，左近衛少將-正五位下-兼中權守-源朝臣-舒，從五位上-行兵部少輔-源朝臣-直，左馬頭-從五位上-藤原朝臣-秀道，木工頭-從五位上-兼行左衛門權佐-紀朝臣-春枝，左兵衛權佐-從五位下-藤原朝臣-直方等，為左司。左相撲司。參議-大藏卿-正四位下-源朝臣-生，參議-正四位下-行右衛門督-兼讚岐守-藤原朝臣-良繩，參議-正四位下-行式部大輔-兼近江守-春澄朝臣-善繩，參議-右近衛權中將-從四位下-藤原朝臣-常行，正四位下-行右兵衛督-源朝臣-勤，從四位上-行右近衛中將-源朝臣-興，右近衛少將-正五位下-兼行讚岐權介-藤原朝臣-有貞，正五位下-行右衛門權佐-藤原朝臣-廣基，從五位上-守右中辨-丹真人-貞岑，從五位上-行右兵衛佐-源朝臣-至，主計頭-兼木工權頭-從五位上-行博士-信濃權守-有宗宿禰-益門，右馬頭-從五位上-在原朝臣-業平等，為右司。右相撲司。

卅日己卯，大祓於朱雀門前，例也。

秋七月庚辰朔，二日辛巳，無品-重子內親王，薨。依內親王平生辭讓，不任緣葬諸司。輟朝三日。內親王者，仁明天皇之皇女，母-從五位下藤原朝臣道長之女也。

三日壬午，信濃國諏方郡水田二段，為彼國建御名方富命神社田。

四日癸未，廣瀨、龍田祭如常。

十二日辛卯，延僧六人，於建禮門，轉讀金剛般若經。

十七日丙申，大風雨。折樹發屋。

十九日戊戌，緣太皇太后御願，於安祥寺，永代相承，持念尊勝真言，轉讀孔雀王經及諸宗經論。其願文曰：「深悲遠慮，調御用心。勝利常行，薩埵攸急。爰從去貞觀元年，在建立安祥寺，奉為田邑天皇，文德。每月一七日，令一七口僧，持念尊勝真言。至今七箇年，已又令彼寺年分栖山僧結番，晝夜無間，轉讀諸宗經論，以奉翊聖朝加護國家。今亦令念孔雀明王，能除災難，令得安樂。一七口僧，每月一七日夜，讀誦件經，不絕音聲。上為諸天釋梵一切神祇，今上陛下、皇太后殿下及

代代國主少君,深草.仁明、田邑兩陵聖靈,先考、先妣二所魂魄,下為太政大臣,王主、公卿,文武庶寮,都鄙黔首.凡諸藤氏者,乃至四恩法界一切含靈,皆能隨尊卑而增福,兼現新當而加榮,早破煩惱,終證菩提.吾之此志也,雖黃泉而不朽,庶俾新新不絕,永永相承,天長地久.修此勝因者,敕下知彼寺,隨御願力,勤能薰修,莫令違失.

廿一日庚子,天皇御建禮門,觀相撲.

廿三日壬寅,天皇於南殿御簾中,觀相撲.左右司遞奏音樂,百戲偕作.

廿六日乙巳,進美作國-從四位下-仲山神階,加從三位.授尾張國-從四位上-真清田神,正四位上.信濃國-正六位上-名立神,備前國-正六位上-神根神,壹岐嶋-正六位上-見上神、真賀山神等,並從五位下.

廿七日丙午,先是,大宰府言:「大唐商人-李-延孝等六十三人,駕船一艘,來著海岸。」是日,敕:「安置鴻臚館,隨例供給。」

廿九日戊申晦,先是,武德殿前有人死.仍大祓於建禮門前,以攘邪穢也.

## 二.以壹演為權僧正與定載車法

八月己酉朔,二日庚戌,雨水.

十一日己未,內膳典膳-正七位下-雀部朝臣-祖道,隱匿司中人死之穢.仍科上祓.

十二日庚申,左右辨官暫移直宮內省.緣天皇擬遷御太政官也.

十五日癸亥,大宰府言:「對馬嶋銀穴在下縣郡,自高山底,穿鑿巖,堀入卅許丈,白晝執炬而得入.頃年以來,處處崩塞,屢費人功.而去夏霖雨,穴底水湛,計其功力,非可堪司私輒穿開.望請,准延曆十五年例,以彼嶋例舉大豆遺百斛,并租地子穀百斛,且其令堀開。」詔許之.

十七日乙丑,屈六十僧於太政官曹司廳,限以三日,轉讀大般若經.天皇欲遷御故,秋季御讀經於此修之.兼以鎮也.

備後國神石、奴可、甲努、惠蘇、世良、三谿、三次、三上八郡,僻居山間,土宜採鐵.連年旱疾,黎庶弊亡.四年之間,每年四郡,更復課役.

廿一日己巳,天皇遷自東宮,御太政官曹司廳.為來十一月將遷御內裏也.當此之時,陰陽寮言:「天皇御本命庚午,是年御絕命在乾。」從東宮指內裏直乾,故避之焉.公卿於中務省廳事,聽尋常政,少納言外記移直中務省.取於近御在所也.

廿四日壬申,太政官獻物.并進酒饌於後宮及饗近臣.

昔弘仁末,沙門-玄賓,於伯耆國會見郡,建立阿彌陀寺.至是,敕永免寺田十二町九段卅步租.本國內百姓所施入也.

廿六日甲戌,民部省獻物.

廿八日丙子,授近江國-從五位上-三上神,正四位下.

九月,己卯朔,詔以山城國葛野郡山地一町八段,賜清源山寺.

三日辛巳,大炊寮有犬產穢.仍停御燈之齋.

五日癸未,敕以藥師寺僧-壹演,為權僧正.遣參議-從四位下-守右大辨-兼行播磨權守-大枝朝臣-音人,從五位上-行少納言-兼侍從-良岑朝臣-經世,率所司向西寺綱所宣制.策文曰:「天皇大命爾坐,諸大法師等爾白左部度宣久.天下乃平久安久可有岐事波,諸佛弟子等乃願誓坐散無爾依天奈留部之止奈毛所念行須.今藥師寺僧-壹演,少壯之時爾酷厭俗塵天,拋官天入道世利.因果之理乎問習天,練耶之行乎企脩已止.專無退轉之天,既經多年氣利.唯身獨乃為爾波不在志乎,國家乎護持都至誠深志,自然爾朕心爾覺知多萬比諸人毛普久聞見多留奈利.然爾太政大臣,良房.去年冬與利重病爾沈天命難存久侍萬之之乎,至今爾平安爾侍萬須事波,顯然爾此僧乃以至心救護爾依天奈利介利.朕我心思字之呂也須久,國家乃無動岐事波,太政大臣一柱爾依天奈利.然物乎極留命乎救比活萬都禮留恩德乎,何為加輕久念保須部岐.古事乎聞食波,如此岐國家乃大楯度安留大臣乃身命乎救止之天波,官庫乃物乎傾盡志.種種爾公勞乎盡左禮氣利.然則,此一僧乎別爾褒賞比天,自今以往毛,大臣乎救衛之女萬都利,天下平安爾在之米牟止奈毛所念行須.然乎此僧天性離欲天,係望女留事一毛聞食禰波,褒賞波牟事乃無禮波奈毛,權僧正爾任賜布.是則令法久住,利有情我為爾奈利止白左部奈止宣命乎白.」

內匠寮始置寮掌二員.

伊賀國-阿拜、山田、伊賀三郡田六町九段二百八十八步,施入貞觀寺.

七日乙酉,中務省獻物.

八日丙戌,式部省獻物.

九日丁亥,於太政官,賜宴群臣.喚文人賦詩,內教坊奏女樂,皆如常儀.公卿已下賦詩者皆起探韻.日暮,賜祿各有差.

是夜,有星.出卷舌入畢首,長可三尺.

十日戊子,夜,有星.出墳墓下,入貫須女.

十一日己丑,是日,可奉幣帛伊勢大神宮.御在所有穢,仍以停止.遣散位-從五位下-岑行王,神祇伯-從四位下-中臣朝臣-逸志,告以事由.

十四日壬辰,敕以遠江國長下郡水田十二町,施入貞觀寺.

十五日癸巳,太政官下知彈正臺:「左右京職、山城、攝津、伊賀、近江、丹波、播磨等國,禁材木短狹.」及定載車法曰:「步板、簀子、梶樽等長短厚薄,去延曆十五年初立法.於是,年月遷改,久忘格意.仍弘仁四年、天長八年、嘉祥三年科罪兼可沒之狀,下知己訖.而採材倫,為貪潤澤,伐斫一本,欲得百利.因茲,裁長要短.而任意為漸,嫌厚求薄,而在手不輟.公途私

用,常多闕乏.頻施嚴制,未聞花肅.雖是愚民之可責,豈非國吏之解體.宜早遵行,無有乖違.沒物科罪,一如先格.但中間所在不法材者,承制之後,百廿日內,悉令覓實.其車荷者,量材長短,先有制法.今舉不法,既責輕薄.運載之法,何應一同.須相樽卅二材,步板八枚,簀子十枚,以此為定.復舊之後,改從恒例.不得因此更令濫吹.長官相承,嚴加督察.示山口及津頭,分明令知.

廿一日己亥,宮內省獻物.

廿二日庚子,河內國-正六位上-野神,近江國-正六位上-石劔神等,並授從五位下.

廿四日壬寅,地震.

廿六日甲辰,敕木工寮,採銅於山城國相樂郡岡田鄉.

舊鑄錢司止.

### 三.壹演上表請辭與和邇部大田磨卒

冬十月,己酉朔,天皇御南殿,賜飲侍臣.南殿謂官廳事.左右近衛府遞奏音樂如常.賜祿各有差.

七日乙卯,中務省言:「被管諸司考文造三通,置於惣省并式部本司等,各為常留.今案物情,式部本司,於事有用,常留之,以是足焉.至于此省,雖有收置之勞,曾無充事之要.每至交替,非無其煩.望請,准宮內省,三年一除,將省物煩.」太政官處分:「被管諸司,長上考文,留三箇年.番上留六箇年.依次除.」

九日丁巳,讚岐國-從五位上-田村神、大水上神,並授正五位下.從五位下-大麻神、城山神、賀茂神、神谷神等,並從五位上.大和國-正六位上-武雷神、保沼雷神,出雲國-從六位上-女月神等,並從五位下.

十六日甲子,詔以權僧正-法印大和尚位-壹演,為超昇寺座主.

十七日乙丑,令五畿、七道,自來月二日,至七日,禁斷殺生.

十九日丁卯,延六十僧於太政官廳事,轉讀大般若經,限三日訖.

廿一日己巳,敕:「河內國平岡神主一人,給春冬當色軾絹帛等,一如平野梅宮神主.又春秋二祭,差神祇官中臣官人一人,檢校祭事,兼付幣帛.又差琴師一人,供事祭場.立為恒例.」

是日,以從五位下-藤原朝臣-元利萬侶,為次侍從.

廿二日庚午,太政官獻物.公卿已下侍從已上侍宴.雅樂寮奏音樂.酣暢竟日,極歡而罷.賜祿各有差.外記以下直丁已上預齋焉.

廿五日癸酉,權僧正-法印大和尚位-壹演,上表請辭職曰:「小僧-壹演言,任非其器,則公私共速其傷,分爽其才,則道俗同罹其咎.壹演凡愚性拙,白業功疏,瓶雀還飛,水萍易合.徒縫慙愧以為衣,難鑄弘誓以為鎧.未遑救己,寧及利他.伏見,太政大臣-藤原朝臣,仁風廣扇,德望高懸.利物之功,希世而出.故及其臥病沈困之時,天下緇素警憂母,或事勞於外,或心焦於中,依佛依神,競祈其命.即知,天答萬人之望,豈偏謂假一身之力乎.而今承黃紙詔命,以小僧為活彼大臣,賜任權僧正.恩出非常,分彰不次,身毛盡豎,伏增胡顏.又其僧正之位者,天下之所瞻仰,四輩中之鎮也.當今才當其途者,寔滋有徒.而非智非行,超加其上,則恐遠乖世尊之教,近貽聖朝之譏.伏願,枉留聖聽,早賜哀許.不任丹款之至,謹上表以聞.」

廿六日甲戌,雅樂權大允-外從五位下-和邇部宿禰-大田磨,卒.大田磨者,右京人也.吹笛出身,備於伶官.始師事雅樂權少屬-外從五位下-良枝宿禰-清上,受學吹笛.清上特善吹笛,音律調弄,皆窮其妙.見大田磨有氣骨,可勵學習,因加意而教之.承和之初,清上從聘唐使,入於大唐.歸朝之日,船遭造風,漂墮南海賊地,為賊所殺.本姓大戶首,河內國人也.清上特善吹笛以下至此,良枝清上事.大田磨能受其道,莫不精究.天長初,任雅樂百濟笛師,尋轉唐笛師.數年,為雅樂少屬,俄轉大屬.齊衡三年,除權大允.貞觀三年正月廿一日,授外從五位下.是日,內宴也,大田磨伎術出群,故加殊.大田磨,本姓和邇部,後賜宿禰.卒時年六十八.

廿七日乙亥,延百僧於本宮內裏,限以三日,轉讀大般若經.天皇欲遷御,故豫鎮之.

廿八日丙子,敕曰:「壹演和尚,省表具之.和尚,恬靖挺性,忍生草之穿身,堪任陶情,慕落花之雨鳥.況復味至味之無味,所貯則死者還生,殊行能行之不行,所練則對治延命.由斯太政大臣寢疾之日,誠賴公力,竟得平安.朕逢旦不寐,深嘉其功.感恩之思,亡德不報.故殊儕類,委以綱維.期一天下之無為,活四海內之有截.而今陳請辭謝,推讓是崇.心雖有出塵之清跡,既無同俗之混.夫大慈之所貴,不繫於一身,弘誓之所先,普及於庶類.豈有神水石,徒遂獨善之求,韜光松蘿,空棄兼濟之願者哉.尚攝和氣息,逾薰禪風,暫屈淡退之志,曲叶緇素之望.」

出雲國-從五位下-左草神、御譯神、阿式神,並授從五位上.尾張國-正六位上-靱江地神、粉地神等,並從五位下.

遠江國長上郡空地百六十町,施入貞觀寺.

廿九日丁丑晦,敕賜讀經百僧度者各一人.

十一月,戊寅朔,地震.

二日己卯,詔贈正五位下-道公-首名,從四位下.首名是良吏也,今追賞焉.

陸奧國磐瀨郡大領-借外從五位下-磐瀨朝臣-富主,授外從五位下.

阿波國名方郡人-忌部首-真貞子,伉儷亡後,經卅餘歲,身臥冢側,心存念佛.遂不再醮,將終一生.詔:「敘位二階,免戶內租.即表門閭,以旌婦之貞焉.」

三日庚辰,美作國久米郡人-秦-豐永,天性孝行,志在恭順.幼稚之年,致養二親.母亡後,常守墳墓.敘位三階,免同籍課役,表門閭,令眾庶知焉.

四日辛巳,敕遣使者於伊勢大神宮,并明神十一社奉幣.告以天皇遷御內裏也.

天皇遷自太政官,御仁壽殿.自此三日,諸衛警固,諸司侍宿宣陽門外廊下.

是日,外記候處還於本局.

七日甲申,平野、春日祭如常。

八日乙酉,梅宮祭如常儀。

十二日己丑,園、韓神祭如常。

十三日庚寅,鎮魂祭如常。

十四日辛卯,新嘗祭。天皇不御神嘉殿。敕遣親王、公卿,向宮內省奉祭。

是夜,地震。

十五日壬辰,天皇御紫宸殿,賜宴群臣。大歌五舞如常儀。宴竟,賜祿各有差。

十七日甲午,授尾張國-從五位下-憶感神,從五位上。

十八日乙未,天皇御射殿。親王已下參議已上侍焉。

是日,木工寮獻物。

廿日丁酉,神祇伯-從四位下-中臣朝臣-逸志等解:「左京人-大中臣朝臣-名高,戶一烟,去貞觀三年稱絕戶。右京人-大中臣朝臣-氏吉,戶一烟,去天安二年稱非民人。並申官除棄。今戶口等披訴,皆有證據。望請,依實還附本貫。詔許之。」

廿一日戊戌,天皇御紫宸殿,王公並侍。左近衛、左衛門、左兵衛等府,并左馬寮獻物。終日宴飲,雜樂皆作。賜祿各有差。

廿五日壬寅,天皇御紫宸殿,王公皆侍。右近衛、右衛門、右兵衛等府,并右馬寮獻物。酣暢作樂,一同前日。賜祿各有差。

廿六日癸卯,授近江國-正六位上-麻生神,從五位下。

以山城國相樂郡舊鑄錢司地廿餘町,為採銅之地。

廿七日甲辰,延僧七口,於內殿裏,修法。

廿八日乙巳,無品-大井內親王,薨。不任緣葬司。以喪家固辭也。帝不視事三日。內親王者,桓武天皇之皇女。母-從四位下-藤原朝臣-河子,從四位上-大繼之女也。

## 四.淺間明神列諸官社與壹演重上辭表

十二月戊申朔,二日己酉,地震。

九日丙辰,敕:「甲斐國-八代郡立淺間明神祠,列於官社。即置祝、禰宜,隨時致祭。」先是,彼國司言:「往年八代郡暴風大雨,雷電地震,雲霧杳冥,難辨山野。駿河國富士大山西峰,急有熾火,燒碎巖谷。今年八代郡擬大領-無位-伴直-真貞託宣云:『我淺間明神,欲得此國齋祭。頃年為國吏成凶咎,為百姓病死,然未曾覺悟,仍成此恠。須早定神社,兼任祝、禰宜。宜潔齋奉祭。』真貞之身,或伸可八尺,或屈可二尺,變體長短,吐件等詞。國司求之卜筮,所告同於託宣。於是,依明神願,以真貞為祝,同郡人伴秋吉為禰宜。郡家以南作建神宮,且令鎮謝。雖然異火之變,于今未止。遣使者察,埋海千許町。仰而見之,正中頂飾造社宮,垣有四隅,以丹青石立。其四面石高一丈八尺許,廣三尺,厚一尺餘。立石之門,相去一尺。中有一重高閣,以石構營。彩色美麗,不可勝言。望請,齋祭兼預官社。」從之。

武藏國,早霜。優復一年。

停廢讚岐國三野郡託磨牧。

阿波國板野郡人-百濟-岑子女,一產三男。給稻三百束,乳母一人。

授伊勢大神宮禰宜-外正五位下-神主-繼長,從五位下。豐受宮禰宜-正六位上-神主-真水,外從五位下。豐受宮者,伊勢大神宮外宮是也。

十一日戊午,月次、神今食祭。天皇不御神嘉殿,所司奉祭如常。

十三日庚申,權僧正-法印大和尚位-壹演,重上表曰:「沙門壹演言前進表章,庶蒙矜察,肅奉還喻更深。臨深谷而悲兢,仰寒天而流汗。壹演雖同瘦鷹,未免啞羊。徒叨四河之同名,難企六波之一岸。加之,素性庸菲,無德無才,何以辱法務之綱維,為道俗所欽仰。伏惟,聖朝陛下,以堯舜之聖德,得旦之賢佐。宣風則俊士如林,贊化則高僧成市。是以四海賢愚,盡甘詮鑿,百官內外,皆有允釐。而今謬降殊恩,辱此非據,上違天造,下慙物情,進退惶怖,罔厝心顏。伏乞曲照丹誠,俯收玄澤,則誤授之譏,無涉於清朝,虛受之嫌,幸免於陋質。匪任違迫之至,謹重上表以聞。」

十七日甲子,敕:「河內國-平岡神四前,准春日大原野神,春冬二祭奉幣,永以為例。」

諸衛士、仕丁等愁訴云:「遠辭鄉國,苦役京都,唯仰養丁之輸物,以羈旅之資用。而本國司稱依詔復徭,養物之數,三分減一。然則留國之民,既蒙十日之復,上京之丁,猶苦一年之役。凡在勞逸,彼此不同。望請,依舊被給。」太政官處分:「宜加增養丁,滿例輸數。」即下知東海、東山、北陸、山陰、南海道,依件行之。

十九日丙寅,於內裏始修佛名懺悔。

敕曰:「權僧正-壹演公,朕以公有洪大之恩,故委之以綱維之任。事詳前詔,何假縷談。惟公,翠草吐榮,紅雲凝質,體無我之輿理,勤利他之深思。朕賞其神韻,欽其德輝,殊加褒崇,願助治化。而頻陳表章,欲遂辭退,唯有謙光之美,恐睽博愛之途。昔道溫不拒宋武之詔,僧理猶奉湘東之命。斯皆感景慕之至誠,豈可以羈束而為累哉。公宜永持綱領,能鎮眾心,使禪室仰棟梁之材,法流競資舟楫之用。然則酬恩之望,既申於朕情,應物之規,何損於公德。義在忘言,旨不多及。自今而後,更勿重陳。」

是日,制:「信濃國使牧御馬,元八月廿九日貢之,今定十五日。冷然院諸牧,元八月廿五日貢之,今定十一日。」

廿日丁卯,令甲斐國於山梨郡致祭淺間明神,一同八代郡。

廿一日戊辰,授下野國-正三位-勳四等-二荒神,從二位。武藏國-正五位下-冰川神,從四位下。駿河國-從五位下-御廬神,從五位上。正六位上-大井神,從五位下。

廿四日辛未,敕遣公卿已下侍從已上於諸山陵墓,奉荷前幣.

夜,有星,出奎婁北,入抵土司空.

廿六日癸酉,武藏國-從五位下-伊多之神,參河國-從五位下-赤孫神,並授從五位上.河內國-正六位上-酒泉神,從五位下.

廿七日甲戌,尾張國言:「昔廣野河流,向美濃國.當于斯時,百姓無害.而頃年河口壅塞,惣落此國.每遭雨水,動被巨害.望請,掘開河口,令趣舊流.」太政官處分:「依請.」

卅日丁丑,大祓於朱雀門前.大儺並如常儀.

日本三代實錄卷十一 終

[\[久遠の絆\]](#) [\[卷第十\]](#) [\[卷十二\]](#) [\[再臨ノ詔\]](#)